

ليه الطيبين يا زمن بضحك عليهم ناس  
واللي معاه أطيان عاملين له قيمة الناس  
بقي كله يا آبا فلوس موازينها ليه اختلت  
تدي لفقيرها دروس وف الخسيس علت  
معكوسه بنت الايه متشقلبة ع الناس  
لو كان فقيرها ده بيه ما كان ف يوم ينداس

(بهاء) ... يا دنيا مالك كدا سايقة العوج ع الناس

رافعه الخسيس للسماء وابن الأصول منداس

=====

(مكتوب علينا)

(بهاء) .... مكتوب علينا نمّر .. ف الصعب يبدو يا خال

و عرفنا طعم المرر.. من لما كنا عيال

نبكي النهار والليل .. و الفرح مش شغال

زي اللي غموا عينيه .. وفاتوه بين الأهوال  
ينده يا خلق أنا مين وإزاي يجيني حنين  
ما يردوا حتى سؤال وأهرب حروح على فين  
والروح كما المساجين و العيشة فرض مُحال !

(ولاء) ... مكتوب علينا الغلب والحزن فيها سنين

ولا دقنا طعم الحب ودموعنا تملئ العين

ف الشدة وقت الكرب ما شفنا بني آدمين

الصبر فيها يارب م انت العالم بالحال

ليه مهما نزرع حب نحصدها مر يا خال

أحزاننا جوة القلب بقى للهموم شيال

زمن الصحاب العيرة وقرابة كلها غيرة

ياما في قلوب شريرة الوصل ليها محال

ف القسوة آه تتوصي وف ظلمها تتمادى

وطبيعي عادي وتنسي والشر فيها زيادة

(بهاء) .... مكتوب علينا نمُر ف الصعب يبدو يا خال

و عرفنا طعم المر من لما كنا عيال

نبكي النهار والليل .. و الفرح مش شغال

زي اللي غموا عينيه .. وفاتوه بين الأهوال

=====

(وطمني)

(بهاء)... صباح الفل لو أمكن

صباح النور يا مُتمكن

ما تيجي نغنى وندندن أنا و انت بعيد ع الناس

اديلي سنين أنادى عليك أنادى بشوق جميلة عينيك

تعالى نزرع الأيام ونرويها العسل بالكأس

صباح النور يا أطيّب قلب

صباح الورد الأبيض طب